

Nuwe Lied Bediening

En Hy het 'n nuwe lied in my mond gegee, 'n lofsang tot eer van onse Elohiem (Ps. 40:4)

E-pos: kontak@nuwelied.info
Webwerf: <http://www.nuwelied.info>

Yom Teruah of Rosh HaShanah.

Die laaste drie jaarlikse afsprake (Feeste; Vasgestelde Tye) van YHVH met Sy kinders, naamlik die Fees van Trompette (*Yom Teruah*;), die Dag van Versoening (*Yom Kippur*) en die Fees van Tabernakels, staan gesamentlik bekend as die Loofhuttefees of *Sukkot*.

Die Fees (Vasgestelde Tyd) van Trompette staan ook bekend as die Fees van die Basuin, die Fees van Shofar en in Hebreeus as *Yom Teruah*. Hoewel daar meestal van die Fees van Trompette gepraat word, is dit meer korrek om te verwys na die Fees van Shofar, want dit was die ramshoring (*shofar*, basuin) wat op hierdie gedenkdag geblaas word. Dit is 'n gedenkdag deur basuingeklank, naamlik die blaas van die shofar. Hoewel daar nie gesê word wat gedenk moet word nie, is hierdie dag bekend as die Fees van Shofar (Basuine, Trompette).

יהוה het met Moshe gepraat en gesê: “Praat met die seuns van Yisra'el en sê: ‘In die sewende maand, op die eerste dag van die maand, moet julle rus. Dit is 'n gedenkdag deur die blaas van die ramshoring (*shofar*), 'n afgesonderde byeenkoms. Julle mag géén gewone werk doen nie en offer aan יהוה 'n offer, deur vuur.’” Lev. 23:23 tot 25 – PWL

Die letterlike betekenis van *teruah* is om 'n groot geraas te maak. Hierdie kan die geraas van 'n trompet of shofar beteken, maar kan ook verwys na die geraas wat 'n groot groep mense maak wat gesamentlik hardop uitroep! 'n Voorbeeld hiervan is in Jos. 6:5 –

en as hulle lang geluide op die ramshoring blaas, as julle die geluid van die horing hoor, moet die hele volk 'n groot krygsgeskreeu (teruah) aanhef: dan sal die stadsmuur op sy plek inval; en die volk moet inklim, elkeen reg voor hom uit.

Die werkwoord *ruah* verwys dikwels na die gesamentlike luidkeelse groep van YHVH se volk.

Al die volke, klap julle hande! Skreeu (ruah) dit uit tot God met 'n klank van triomferende vreugde. Ps. 47:2 – PWL.

Vir die musiekleier: 'n gedig met instrumentale musiek; 'n lied. Roep uit (ruah) tot eer van God, alle lande! Ps. 66:1 – PWL.

Volgens YHVH se kalender vind die Fees van Shofar op die eerste dag van die sewende maand plaas, maar wat volgens die Joodse (Israel se) burgerlike kalender bekend is as die eerste dag van die eerste maand Tishri. Die Fees van Shofar is dus die eerste dag van die nuwe jaar volgens die Jode se burgerlike kalender en is daarom bekend as *Rosh HaShanah*

wat *die kop van die jaar* beteken. Hierdie is egter teenstrydig met wat Torah ons leer, naamlik dat YHVH se kalender op die eerste dag van die eerste maand bekend as Nissan begin.

יהוה het met Moshe en Aharon in die land van Mitzrayim gepraat en gesê: “Hierdie maand sal vir julle die begin van die maande wees; dit sal vir julle die eerste van die maande van die jaar wees. Ex. 12:1 en 2 – PWL.

Volgens Rabbynse Judaïsme se burgerlike kalender is YHVH se sewende maand van die jaar dus Judaïsme se eerste maand van die nuwe jaar! Verwarrend?! Rabbynse Judaïsme regverdig hulself deur *Rosh HaShanah* te beskou as die geboortedag van die wêreld op grond van die eerste Hebreeuse woord in Gen. 1:1 wat lees *b’reshiyth* Indien hierdie woord omgedraai word lees dit *Aleph b’Tishri* wat *die eerste van Tishri* beteken. Op hierdie dag, so word geglo, het YHVH Sy skepping voltooi. Daar is egter geen Skriftuurlike bewys daarvoor nie, veral indien in aanmerking geneem word dat YHVH die maande van die jaar nie name gegee het nie, maar dit slegs numeries aangedui het.

Hierdie feit is duidelik volgens Levitikus 23 en Numeri 28. Dit was gedurende die Babiloniese ballingskap wat die wysgere van ouds die Babiloniese name vir die maande van die jaar begin gebruik het. Die Jerusalem Talmud bevestig dit: “The names of the months came up with them from Babylonia.” (Jerusalem Talmud, Rosh Hashanah 1:2 56d).

Ten spyte daarvan dat YHVH se Torah baie duidelik in Ex. 12:13 sê dat ander gode se name nie eers genoem mag word nie, het Judaïsme byvoorbeeld die vierde maand van hulle burgerlike kalender die afgodsnaam Tammuz gegee. In Esegïël lees ons die volgende aangaande wat YHVH die profeet aangaande Tammuz gewys het:

Toe het Hy my gebring na die noordelike ingang van die poort van die huis van יהוה en let op, vroue het daar gesit en huil vir Tammuz. Hy sê vir my: “Het jy dit gesien, seun van ’n mens? Tog sal jy nog groter verwerplikhede sien as hierdie.” Eseg. 8:14 en 15 – PWL.

Wat hier beskryf word is die aanbidding van die afgod Tammuz in die tempel. Volgens Babiloniese mitologie is Tammuz tydens ’n ’n jagtog deur ’n wildevark verskeur. Dit was dan jaarliks die gebruik om sy dood te beween met gepaardgaande tempelprostitusie. Na hierdie weentydperk het Tammuz, so was geglo, uit die dood opgestaan.

Sommige van die Babiloniese name vir die maande verskyn wel in die Tanakh, maar gaan dan altyd gepaard met die numeriese vir die betrokke maand, soos byvoorbeeld in Ester 3:7

In die eerste maand, dit is die maand Nisan, in die twaalfde jaar van koning Ahasvéros, het hulle die Pur, dit is die lot, voor Haman gewerp vir elke dag en vir elke maand, twaalf in getal, dit is die maand Adar.

’n Verdere invloed wat Babilon gehad het was op die viering van *Yom Teruah* as ’n nuwejaarsfees. Aangesien die Babiloniërs ’n soortgelyke maan-sonkalender as die van die Skrifte gevolg het, en aangesien hulle nuwejaarsfees van *Akitu* (*Akitum* – *die oes van die gars*) op die eerste van die Babiloniese maand Tishri gedenk was, het dit die weg gebaan om *Yom Teruah* as ’n ‘Joodse Akitu’ te gedenk. Die feit dat die Torah nie ’n duidelike rede gee vir die viering van *Yom Teruah* nie, het dit makliker gemaak vir die Rabbies om van *Yom Teruah* na *Rosh HaShanah* om te skakel!

Dit is dus 'n geskiedkundige feit dat die ontstaan van *Rosh HaShanah* in Babilon was en dat dit 'n afgodsfees is wat 'gejudaïeseer' is. Gedurende die vierde eeu voor Messias, toe die Jode na Jerusalem teruggekeer het om die tweede tempel te bou, was die gebruike en betekenis van *Rosh HaShanah* reeds goed gevestig gewees. Babilon het nog vir vele jare die sentrum van Judaïsme gebly en dit was die ontstaan van die Babiloniese Talmud.

Nehemia Gordon van die Karaiëte skryf die volgende:

It is outright bizarre to celebrate Yom Teruah as New Years. In contrast to Babylonian paganism, the Torah does not say or imply that Yom Teruah has anything to do with New Years. On the contrary, the Feast of Sukkot (Booths), which takes place exactly two weeks after Yom Teruah, is referred to in one verse as "the going out of the year" (Exodus 23:16). This would be like calling January 15 in the modern Western calendar "the going out of the year". the Torah would not describe Sukkot in this manner if it intended Yom Teruah to be celebrated as a New Years (How Yom Teruah Became Rosh Hashanah en is beskikbaar by <http://www.nehemiaswall.com/yom-teruah-day-shouting-became-rosh-hashanah>).

Die meeste hedendaagse Jode ken hierdie Vasgestelde Tyd van YHVH as *Rosh HaShanah* en nie as *Yom Teruah* nie. Judaïsme glo dat God se oordeel op *Rosh Hashanah* die verloop van die nuwe jaar gaan bepaal. Daarom word hierdie dag gekenmerk deur beide vreugde en somberheid. Vreugde oor die nuwe jaar wat begin terwyl dit ook 'n geleentheid van selfondersoek en die herstel van verhoudinge met YHVH en medemens is. Soos reeds genoem word *Rosh HaShanah* beskou as die geboortedag van die wêreld. Op hierdie dag, so word geglo, het YHVH Sy skepping voltooi.

Op *Rosh HaShanah* groet Jode mekaar met die woorde: *L'shanah tovah tikateivu, v'tehateinu* wat beteken: Mag jy ingeskryf en verseël wees in die goeie Boek van die Lewe vir 'n goeie jaar. In die lig van die Messiaanse betekenis van *Yom Teruah* is hierdie ook 'n gepaste wyse om mekaar te groet!

Indien ons egter die afgode oorsprong van *Rosh HaShanah* besef, en dit steeds gedenk, dan mis ons die doel en betekenis van *Yom Teruah*!

Slotsom: *Rosh HaShanah* is nie deel van YHVH se Vasgestelde Tye nie! Laat ons hou by die waarheid soos in Torah opgeteken is, want *Rosh HaShanah* is die bewys van hoe die Rabbies by Torah kan byvoeg en wegneem!

Soos die Christendom 'n heidenfees 'verchristelik' het en dit kersfees genoem het; net so het die Jode 'n heidenfees 'gejudaïeseer' en dit *Rosh HaShanah* genoem.

Ek het 'n ander stem uit die hemel hoor sê: "Gaan uit haar uit, My volk sodat julle nie deel kry aan haar sondes en nie van haar plaë ontvang nie, want die sondes in haar het opgestapel tot by die hemel en God het haar boosheid in herinnering geroep. Open. 18:4 – PWL.

Gaan uit haar – uit die Christendom en uit Judaïsme – uit my volk!! Yeshua het gesê dat as ons in Sy Woord bly, is ons sy dissipels en dan sal die waarheid ons vrymaak (Joh. 8:31 tot 32)!

Ontvang YHVH se Woord met welwillendheid, maar ondersoek self die Skrifte of hierdie dinge die waarheid is (Hand. 17:11).

Shalomgroete.
Johan.

E-pos: kontak@nuwelielied.info

Webwerf: <http://www.nuwelielied.info>

Kopieë mag gemaak en gratis versprei word, maar mag nie verkoop word nie. Geen veranderinge mag aan die oorspronklike teks aangebring word en dit dan onder die naam van Nuwe Lied Bediening versprei nie.